

STJÓRNARTÍÐINDI B 136 – 2003

Nr. 891

2674

1. desember 2003

AUGLÝSING

(II) um staðfestingu reglna sveitarfélaga um úthlutun byggðakvóta.

1. gr.

Með vísan til 3. mgr. 4. gr. reglugerðar nr. 596, 8. ágúst 2003, um úthlutun á 1.500 þorskígildislestum til stuðnings sjávarbyggðum, staðfestir ráðuneytið eftirgreindar úthlutunarreglur þessara sveitarfélaga:

1. Gerðahreppur.

Úthlutað verði til fiskiskipa sem skráð eru í Garði. Hluta Gerðahrepps verði skipt jafnt milli skipa sem sækja um og sem aflahlutdeild hafa. Aflinn verði unninn í Garði.

2. Stykkishólmsbær.

Hlut Stykkishólmsbæjar verði skipt milli þeirra skipa sem stunduðu skelveiðar frá Stykkishólmi á vertíðinni 2002/2003. Úthlutun til einstakra skipa verði í hlutfalli við aflaheimildir þeirra í skel á sömu vertíð.

3. Húnaþing vestra.

1. Hlut Húnaþings vestra verði skipt milli einstakra fiskiskipa í eigu útgerða sem hafa lögheimili í Húnaþingi vestra og gera út frá Hvammstanga, í hlutfalli við landaðan afla þeirra í þorskígildislestum talið á Hvammstanga á fiskveiðiárinu 2002/2003.
2. Við úthlutun skal ekkert fiskiskip hljóta meira en 15 þorskígildislestir miðað við óslægðan fisk.
3. Afla sem úthlutað er samkvæmt þessum reglum skal landað á Hvammstanga.
4. Umsóknarfrestur um úthlutun byggðakvóta er til 10. desember 2003. Umsóknir verða afgreiddar af sveitarstjórn Húnaþings vestra fyrir 20. desember 2003.

4. Blönduósbær.

1. Skipta skal aflaheimildum þeim sem koma í hlut sveitarfélagsins til báta sem annars vegar stunda veiðar fyrir fiskvinnslufyrirtækið Norðurós ehf. og hins vegar milli báta sem stunda veiðar fyrir rækjuvinnslu Særúnar hf. Koma þannig 32,5 lestrir í hlut þeirra báta sem gera samning við hvort fiskvinnslufyrirtæki og verður þeim skipt jafnt á umsækjendur.
2. Blönduósbær mun auglýsa eftir umsóknum og verður kvótanum úthlutað til jafns milli

þeirra fiskiskipa sem sótt verður um fyrir, enda hafi samkomulag verið gert við annað hvort fiskvinnslufyrirtækið að uppfylltum eftirfarandi skilyrðum:

- a) Bátar séu skráðir í sveitarfélaginu.
- b) Séu bátar ekki skráðir í sveitarfélaginu skulu þeir eiga kost á aflaheimildum eigi þeir samstarf um veiðar við ofangreind fiskvinnslufyrirtæki á Blönduósi og liggja staðfest skriflegt samkomulag því til staðfestingar.
- c) Að minnsta kosti einn þriðji hluti áhafnar viðkomandi báts hafi átt lögheimili í Blönduósbæ 1. september 2003.

3. Öll vinnsla aflans fari fram innan sveitarfélagsins.
4. Aflaheimild er ekki framseljanleg og skulu hlutaðeigendur afsala sér þeim geti þeir ekki farið að þeim reglum sem um ráðstöfunina gilda.

5. Höfðahreppur.

Eftirfarandi reglur gilda um úthlutun aflaheimilda sem koma í hlut Höfðahrepps:

1. Aflaheimildum verði skipt milli þeirra skipa sem skráð hafa verið með heimahöfn á Skagaströnd fiskveiðiárið 2002/2003 eða að eigendur þeirra hafi átt lögheimili þar á sama tímabili og hafi skráð þar skip 1. september 2003.
2. Úthluta skal fiskiskipum sem minni eru en 250 brl. og eiga aðeins aflamarks- og króka-aflamarksskip rétt til úthlutunar. Aflaheimildir skulu skiptast jafnt milli fiskiskipa sem falla undir reglur þessar en þó skulu aflaheimildir hvers skips ekki aukast um meira en helming miðað við úthlutun í upphafi yfirstandandi fiskveiðiárs.
3. Einungis verði úthlutað til fiskiskipa þeirra umsækjenda sem leggja fram samkomulag við fiskvinnslu á Skagaströnd um úrvinnslu aflans, sem úthlutað er á grundvelli þessara reglna auk þess sem umsækjendur lýsa yfir vilja sínum til að leggja jafnmargar þorskígildislestir á móti til vinnslu á staðnum og sem úthlutuninni nemur.

6. Ólafsfjarðarbær

1. Úthlutuðum byggðakvóta Ólafsfjarðarbæjar skal landað og hann unninn á Ólafsfirði.
2. Útgerðaraðilar aflamarksskipa og krókaaflamarksbáta sem skráðir eru frá Ólafsfirði 1. september 2003 eiga rétt til úthlutunar, enda hafi þeir gert samninga við fiskvinnslufyrirtæki á Ólafsfirði um vinnslu aflans.
3. Úthlutaður byggðakvóti er ekki framseljanlegur en heimilt er að skipta á jöfnu á markaðsvirði á öðrum tegundum en þorski án þess að það teljist framsal á úthlutuðum aflaheimildum.
4. Áskilið verði í samkomulagi við hlutaðeigandi að hann afsali sér aflaheimildunum geti hann ekki farið að þeim reglum sem um ráðstöfun þeirra gilda.

7. Dalvíkurbyggð.

1. Úthlutaður byggðakvóti Dalvíkurbyggðar skal unninn í Dalvíkurbyggð og skal liggja fyrir samningur þar um við fiskvinnslu.
2. Umsóknir um byggðakvóta skulu berast bæjarstjóra fyrir 20. nóvember 2003. Með umsókn skal fylgja staðfesting á kvótaúthlutun 1. september 2003. Einungis verður úthlutað til báta sem skráðir eru í sveitarfélaginu.
3. Við úthlutun verður miðað við kvótaeign eins og hún var 1. september 2003. Úthlutun skal þó aldrei hærri en kvótaeign í upphafi fiskveiðiárs og aldrei hærri en 5 þorskígildislestir.
4. Úthlutaður byggðakvóti er ekki framseljanlegur en heimilt er að skipta á jöfnu á markaðsvirði á öðrum tegundum en þorski án þess að það teljist framsal á úthlutuðum aflaheimildum.

5. Áskilið verði í samkomulagi við hlutaðeigandi að hann afsali sér aflaheimildunum geti hann ekki farið að þeim reglum sem um ráðstöfun þeirra gilda.
6. Þann 1. ágúst 2004 skulu útgerðir þeirra skipa sem úthlutað fá byggðakvóta samkvæmt þessum reglum skila inn skýrslu um nýtingu hans.

8. Hriseyjarheppur.

1. Rétt til úthlutunar eiga aflamarksskip og krókaaflamarksbátar, sem skráðir eru í Hrisey 1. september 2003 auk þeirra krókaaflamarksbáta sem lönduðu afla sínum í sveitarfélaginu sl. fiskveiðiár.
2. Aflaheimildum skal úthlutað á grundvelli 3. gr. reglugerðar nr. 596/2003 með því skilyrði að fyrir hvert þorskígildi sem fiskiskipi er úthlutað skal útgerð leggja tvö þorskígildi á móti. Skilyrði er að öllum afla verði landað í Hrisey og hann unninn hjá fiskvinnslufyrirtækjum staðarins. Fullnægi fleira en eitt skip þessum skilyrðum skal byggðakvótanum skipt jafnt milli fiskiskipa umsækjenda, þó þannig að heildaraflamark einstakra fiskiskipa aukist ekki um meira en 100%.
3. Fiskiskip skulu fyrst landa eigin aflaheimildum áður en byggðakvóti er fluttur á viðkomandi skip.
4. Útgerð sem fær úthlutað byggðakvóta er ekki heimilt að selja eða leigja eigin aflaheimildir á fiskveiðiárinu 2003/2004.
5. Ef útgerð telur sér ekki fært að ljúka veiðum á byggðakvóta á fiskveiðiárinu 2003/2004 skal hún gera sveitarstjórn skriflega grein fyrir því fyrir 15. júní 2004. Skal útgerðin þá afsala sér byggðakvótanum og verður honum skipt jafnt milli þeirra fiskiskipa sem fengið hafa úthlutun.
6. Umsóknarfrestur um byggðakvóta er til 20. desember 2003 og verður öllum umsóknum svarað fyrir 20. janúar 2004.

9. Húsavíkurbær.

Aflaheimildum skal skipt milli skipa allt að 200 brt. sem skráð voru með heimahöfn á Húsavík 1. september 2003 og voru í eigu útgerða með heimilisfesti í Húsavíkurbæ á sama tíma, skv. eftirfarandi skilmálum:

1. Að jafnaði skal viðkomandi skip veiða 80% af úthlutaðu aflamarki fiskveiðiársins 2003/2004 eða jafngildi þess. Séu aflaheimildir fluttar frá skipi skal að lágmarki flytja jafngildi þeirra aflaheimilda til skips.
2. Afla sem jafngildir að lágmarki 80% af úthlutaðu aflamarki fiskveiðiársins 2003/2004 skal landað til vinnslu á Húsavík og skal útgerð skips framvísa samningi um kaup/vinnslu afla þar sem skýrt kemur fram að umræddum afla verði landað til vinnslu á Húsavík.
3. Aflaheimildum skv. reglum þessum verður ekki úthlutað á skip fyrr en aflamark, skv. 1. gr. hefur verið veitt.
4. Við úthlutun aflaheimilda skv. reglum þessum skal heimilt að úthluta á skip þótt því hafi ekki verið úthlutað aflamarki á fiskveiðiárinu 2003/2004 enda hafi það á fiskveiðiárinu landað til vinnslu á Húsavík tvöföldu því magni sem úthlutað er skv. þessum reglum.
5. Úthlutun aflaheimilda á einstök skip skv. reglum þessum skal vera að hálfu jöfn á öll skip og að hálfu í hlutfalli við úthlutað aflamark þeirra á fiskveiðiárinu 2003/2004, sbr. 4. gr.
6. Útgerðir þeirra skipa sem falla undir þessar reglur skulu sækja um aflaheimildir skv. þessum reglum til bæjarráðs Húsavíkurbæjar. Umsóknum skulu fylgja gögn skv. 2. tl. Með umsókn um veiðiheimildir skv. reglum þessum samþykkja viðkomandi þá skilmála sem reglurnar fela í sér.

10. Öxarfjarðarhreppur.

1. Þeir sem áhuga hafa á því að sækja um byggðakvóta skulu leggja inn skriflega umsókn þar um fyrir 31. desember 2003 á skrifstofu Öxarfjarðarhrepps.
2. Til að útgerð komi til greina við úthlutun byggðakvóta, þarf hún að sýna fram á að a.m.k. kosti helmingur áhafnar hafi verið búsettur í sveitarfélaginu þann 31. ágúst 2003.
3. Fyrir 30. apríl 2004 skulu útgerðaraðilar sem fengið hafa byggðakvóta skv. reglum þessum gera grein fyrir hvernig þeir muni nýta úthlutaðar aflaheimildir fyrir lok kvótaársins. Geti útgerðaraðili ekki sýnt fram á nýtingu eða geri ekki grein fyrir því hvernig nýtingu verði háttáð mun sveitarstjórn úthluta heimildinni til annarra útgerðaraðila sem sótt hafa um skv. 1. og 2. tl.
4. Byggðakvótanum verður skipt jafnt milli þeirra umsækjenda sem til greina koma skv. 1.–3. tl.

11. Austurbyggð.

1. Úthlutuðum aflaheimildum verður skipt milli þeirra skipa sem skráð hafa verið með heimahöfn í Austurbyggð fiskveiðiárið 2002/2003. Einnig eiga skip rétt á úthlutun ef eigendur þeirra hafa átt lögheimili og starfsstöð í Austurbyggð á sama tíma.
2. Byggðakvóta skal skipt jafnt milli þeirra skipa sem til greina koma.
3. Skilyrði fyrir úthlutun er að útgerð skips skuldbindi sig til að landa til vinnslu í Austurbyggð þeim afla sem úthlutað verður skv. þessum reglum. Jafnframt skuldbindi hún sig til að landa til vinnslu á staðnum þreföldu því magni sem hún fær úthlutað. Í lok fiskveiðiárs skal viðkomandi skila staðfestingu frá vinnslu um að tilskilið magn hafi borist henni.
4. Verði útgerð sem úthlutað er samkvæmt þessum reglum uppvís að því að virða ekki þau skilyrði sem sett eru varðandi vinnslu afla í sveitarfélaginu fyrirgerir hún rétti sínum til hugsanlegrar úthlutunar á næsta ári.

12. Vestmannaeyjar.

1. Útgerðir sem uppfylla eftirfarandi skilyrði eiga kost á byggðakvóta sækja þær um:
 - a) Að bátar þeirra séu skráðir í Vestmannaeyjum.
 - b) Að þær hafi lögheimili í Vestmannaeyjum.
 - c) Að þær leggi fram tvö kíló af eigin aflaheimildum fyrir hvert kíló sem þeim er úthlutað af byggðakvóta Vestmannaeyjabæjar.
 - d) Að þær landi aflanum í Vestmannaeyjum.
 - e) Að þær leggi fram skriflegt samkomulag við fiskvinnslur í Vestmannaeyjum um vinnslu þeirra aflaheimilda sem þeim verður úthlutað skv. þessum reglum og afla skv. c. lið.
2. Byggðakvóta skal skipt milli fiskiskipa í hlutfalli við landaðan afla þeirra í Vestmannaeyjum á síðasta fiskveiðiári.
3. Útgerðum er óheimilt að famselja aflaheimildir sem úthlutað er á grundvelli þessara reglna. Framselji útgerðir aflaheimildir á yfirstandandi ári skulu þær afsala sér sambærilegu magni af byggðakvótanum sem þá verður úthlutað að nýju.
4. Útgerðir skulu í einu og öllu fara að þeim skilyrðum sem hér koma fram, þar á meðal skulu forráðamenn þeirra skrifa undir samkomulag við Vestmannaeyjabæ um að þær afsali sér aflaheimildum fari þær eða geti þær ekki farið að þeim reglum sem um úthlutun byggðakvótans gilda. Þá fyrirgera útgerðir sem ekki fara að skilyrðum reglnanna rétti sínum til hugsanlegrar úthlutunar á næsta ári, að óbreyttum reglum.

2. gr.

Fjarðabyggð.

Með auglýsingu þessari eru jafnframt leiðréttar reglur Fjarðabyggðar sem birtust í auglýsingu nr. 855, 17. nóvember 2003, að því leyti að miða skal við fiskveiðiárið 2003/2004 í 1. tl. reglanna en ekki fiskveiðiárið 2002/2003 eins og þar segir.

3. gr.

Að þessari auglýsingu birtri skulu sveitarstjórnir auglýsa eftir umsóknum og kynna úthlutunarreglur. Að loknum fresti sem sveitarstjórn veitir til umsókna, gerir sveitarstjórn síðan tillögur til ráðuneytisins um endanlega skiptingu aflaheimildanna milli einstakra fiskiskipa. Fallist ráðuneytið á tillögur sveitarstjórna koma þær til framkvæmda. Að öðrum kosti er aflaheimildum skipt milli einstakra fiskiskipa á grundvelli 3. gr. reglugerðar nr. 596/2003.

4. gr.

Auglýsing þessi er gefin út samkvæmt 3. mgr. 4. gr. reglugerðar nr. 596, 8. ágúst 2003, um úthlutun á 1.500 þorskígildislestum til stuðnings sjávarbyggðum, til að öðlast þegar gildi.

Sjávarútvegsráðuneytinu, 1. desember 2003.

F. h. r.

Jón B. Jónasson.

*Þórður Eyþórsson.***AUGLÝSING****um deiliskipulag á Akranesi.**

Breyting á deiliskipulagi Flatahverfis, klasi 1 og 2, lóð við Eyrarflöt nr. 6.

Á fundi bæjarstjórnar Akraness sem haldinn var þann 28. október 2003, var samþykkt breyting á deiliskipulagi Flatahverfis, klasi 1 og 2, lóð nr. 6 við Eyrarflöt á Akranesi.

Breytingin felst í að fellt er út ákvæði um að byggður skuli bílakjallari sé byggt 3ja hæða hús. Samhliða því fjölgar bílastæðum á lóð. Aðkoma lóðar verður um vesturenda þar sem áður var gert ráð fyrir skábraut niður í bílakjallara. Afnumin er bindandi byggingarlína á norðurhlið byggingar. Byggingarreitur er rýmkaður til suðurs og verður 8 m frá lóðamörkum í stað 14 m. Jafnframt er byggingarlína til norðurs færð sunnar. Kvöð um gangstétt er færð að nyrðri lóðamörkum og er 1,6 m breið. Staðsetning sorps verður sunnan gangstígs við nyrðri lóðamörk.

Deiliskipulagsbreytingin var kynnt skv. 2. mgr. 26. gr. skipulags- og byggingarlaga nr. 73/1997 og hefur hlotið þá meðferð sem skipulags- og byggingarlög mæla fyrir um.

Deiliskipulagsbreytingin tekur þegar gildi.

Akranesi, 3. desember 2003.

Ólöf Guðný Valdimarsdóttir skipulagsfulltrúi.